

PABLONËN CORINTONU 'ICË UNICAMA BUANMITËCÉAN QUIRICA

Corintonuaxa ax Jesucristomi catamëcë unicama Pablonën quirica cuënëoxuan

1 ¹Ëx Pablo 'ixun cana mitsu quirica buánmin, camina bití 'ain. Nucën Papa Dios cuëncësabi oquin ca Jesucristonën 'ën a ñuiquin aín bana uni ñuixunun 'ë cafsacëxa. An caísa 'ixun cana Timoteobëtan mitsu quirica buánmin. Axribi Jesúsmi catamëcë 'aish ca nun xucën 'icën. Mitsúxmi Corinto ëmanu 'icë axa Jesucristomi catamëcë unicama 'imainun Acaya menu 'icëcama axa Jesucristo cupí Nucën Papa Diosan iscëx upí 'icë, micama cananuna ënë quirica buánmin. ²Usa 'aínmi Nucën Papa Dios 'imainun Nucën 'Ibu Jesucristonën nuibacëx chuámarua bucucanti cana cuënin.

Tëmëraibi ca Nucën Papa Diosan nu 'aquinia quixuan Pablonën ca

³Nucën Papa Dios ax ca Nucën 'Ibu Jesucristo aín Dios 'ianan aín Papa 'icën. Camabi unin ca a rabiti 'icën. Ax ca Nucën Papa Dios 'icën. Ax ca an nuibaquin upí 'inun nu 'imianan nu masá nuitutiabi upí oquin sinánmiti, a 'icën. ⁴Uísa ñu cara 'ia 'icëbënu a cupí tëmërai masá nuitutiabi ca Nucën Papa Diosan upí oquin sinánun nu 'imia. An nu usaquin 'imicë cupí cananuna bëtsi uni nux 'icësaribitia tëmërai masá nuitutiabi, 'ë 'aquincësaribi oquin ca

Nucën Papa Diosan mi 'aquinti 'icë quixun caquin 'aquinti 'ain. Usaquinu uni itsi 'aquinun ca Nucën Papa Diosan nuxnu masá nuitutiabi upí oquin sinánun nu 'imia. ⁵Jesucristonan cupí cananuna axa tëmërasaribi oi 'aisamairai tëmërain. Usa 'icëbi ca Nucën Papa Diosan, nuxnu Jesucristonan cupí, upíira oquin nu 'aquinia. ⁶Mitsúnmi —Nucën Papa Diosan ca nu nuibatia —quixun 'unánan Jesucristomi catamëti mitsun 'ucha tërëncë 'aish aín uni 'inun cananuna tëmëraqinbi aín bana mitsu ñuixuan. Mitsúnmi Nucën Papa Diosan ca mitsu tëmërafbimi cuënnun 'imiti 'icë quixun 'unánun ca an nuxnu tëmëraqinbi tanshiti cuënnun nu 'imia. Usaquin 'unánquin camina mitsun nux 'icësaribiti tëmëraqinbi Jesucristomi catamëti ënquinma tanshiti 'ain. ⁷Cananuna 'unanin, nux 'icësaribiti mitsux masá nuituti tëmëraibi camina Nucën Papa Diosan upí oquin sinánmicë 'ain. Usa 'ain cananuna, uísa ñu cara 'icëbëbi camina Jesucristomi catamëquin ënima quixun sinani, masá nuitutíma cuënin.

⁸Ën xucëantu, mitsúnmi 'unánun cana mitsu cain, Asia menuxun 'aisamaira oquin tëmëraqin cananuna sinan, cananuna tënëtima 'ai quixun. Usa 'ain cananuna bamati sinan. ⁹Asérabi cananuna bamai quixun cananuna sinan. A ñucamax ca ësaquin nun

sinánun 'iaxa: Nuxbi cananuna iétima 'ain, Nucën Papa Dios, an uni bamacëbi baísqumiti, ainshi ca nu iémiti 'icë quixun. ^{10,11}Nuxnu bamati 'icëbi ca Nucën Papa Diosan nu iémiaxa. Usa 'ixun ca usabi oquin nu 'ati 'icën. Cananuna 'unanin, mitsúnmi a nu ñucáxuncëxun ca an 'acésabi oquin nu iémiti 'icën. 'Itsa unían a nu ñucáxuncë xuan, an nu iémianan nu 'aquincë cupí, nun upí oquin bana ñuixunia cuati ca ami sinánquin 'aisamaira unin cuëenquin, asábi ca quixun caquin Nucën Papa Dios rabiti 'icën.

I. —ASERABIA NUCËN PAPA DIOSAN CAISCË 'IXUN CANA BANA ÑUIXUNI —QUIXUAN PABLONËN CA (1.12-7.16)

Uisa cupí cara Pablo Corintonu cuanma 'icë quicë bana

¹²Cananuna asérami 'unanin, Nucën Papa Diosan 'imicëx nun nuitu upí 'ixun cananuna unicama paránquinma ñu upíshi 'a quixun. Unícaman ca usafnu 'ia nu isaxa. Uni itsían nu iscësamaira oquin camina usafnu 'ia mitsun nu isacën. Usaquin sinani cananuna cuëeinra cuëenin. Nunbi unin sináncësa oquin sinani cananuna usai 'icëma 'ain. Nucën Papa Diosan nu nuibaquin 'aquincëxëshi cananuna usai 'ian. ^{13,14}Nun cananuna mitsúnmi ënë bana cuaisama oquin 'axun mitsu paránuxun quirica buánmicëma 'ain. Nucën 'Ibu Jesús ucëbëmi mitsux abë 'icë isi cananuna —nun bana ñuixuan cupí ca atux Jesucristobë 'icë —quixun sinani cuëeinra cuëenti 'ain. Nux cuëencësaribi oi camina, —Pabloëtan ca abë 'icë unicaman nu 'unánmiacëxa —quixun sinani, nu nuibati cuëenti 'ain. Usai ca 'iti 'icë quixun 'unánquinmi mitsun upíra oquin 'unánti cana cuëenin.

¹⁵Mitsúxmi usai nubë cuëenti 'unánx cana mitsu isi rabëti cuanti sinan, mitsúxmi nubë isanani cuëenun. ¹⁶Macedonia menu cuanquin mitsu isbiantancëxun Macedonia menuax utëcënquinribi mitsu isti cana sinan. Anu 'icëmi Judea menu cuanun mitsun 'ë 'aquinti cana sinan. ¹⁷¿Sinánxunmaishi carana usaquin mitsu can? Jesucristonanna mitsu ca —cana 'atima 'ai —quixun 'unanibi —cana 'ati 'ai —quia. ¿Mitsúnmi sináncëx carana 'ëx usa uni 'ain? ¹⁸Usama cananuna nux 'ain. Nucën Papa Diosan ca 'unania, nux —cananuna cuanti 'ai —quiquin cananuna —asérami cananuna cuanti 'ai —quixun sinan. ¹⁹Nucën Papa Diosan Bëchicë Jesucristo, a 'ëbëtan Silvano 'imainun Timoteonën mitsu ñuixuncë, an ca —cana 'atima 'ai —quixun 'unánquinbi —cana 'ati 'ai —quixun uni cáma 'icën. An ca axa quicësabi oquin 'aia. ²⁰Nucën Papa Dios quicësabi oi ca camabi ñu Cristo Jesús cupí sënëoncë 'iti 'icën. Usaquin 'unánquin cananuna Jesucristo cupí, aín bana quaquin —ca usai 'iti 'icë —quixun Nucën Papa Dios rabin. ²¹Nucën Papa Dios ax ca an micama 'acësaribi oquin nuribi Cristomi catamëcë 'aish ax cuëencësabi oi 'inun 'imicë a 'icën. 'Imianan ca nuxnu asérami ainan 'inun nu 'imiacëxa. ²²Nux ainan 'aish cananuna xëñibua 'aínbi abë 'iti 'ai quixunu 'unánun ca Nucën Papa Diosan aín Bëru Ñunshin Upí nubëa 'inun nu 'inácëxa. ²³Nucën Papa Diosan ca 'ën nuitu mëu 'ën ësaquin sináncë 'unania, mitsu nuibaquin mitsúxmi upí 'icë isti cuëeni cana mitsu isi cuanti sinanibi cuancëma pain 'ain. Nucën Papa Diosan ca 'unania, usa ca quixun. ²⁴Jesucristomi upiti sinani camina mitsux ami cushicë 'ain. Mitsúxmi usai 'ia cananuna nun cacësa oími 'inun mitsu caiman.

Jesucristomi upiti catamëcë 'aíshmi chuámashirua tani cuëeni upitax bucunun quixuinshi cananuna mitsu 'aquinsa tanin.

2¹Mitsu masá nuitumiti rabanan cana mitsu isi bënëtishi cuantëcëntima sinan. ²¿'Ën mitsu masá nuitumia cara uin 'ë upí oquin sinánmiti 'ic? 'Ën sapi cana mitsu masá nuitumia, usa 'aínbi camina mitsúinshi 'ë upí oquin sinánmiquin 'ë cuëenmiti 'ain. ³Mitsu isi cuaniami 'ë masá nuitumiti rabanan cana cuanquinma mitsu usaía quicë quiricashi buánmian. Buánmiquin cana sinan, 'ëx cuani masá nuitutíma cuëenia isi camina mitsúxribi upí oquin sinani cuëenti 'ai quixun. ⁴Mitsu buánminuxun a quirica cuëñëoi cana mitsu sinani masá nuituti bëunan mëscuti 'ian. Mitsúxmi masá nuitunun quixun cana a quirica 'acëma 'ain. 'Ën cana aséribi mitsu nuibati quixunmi 'unánun cana usaquin 'an.

**Axa numi 'uchacë uni aín
'ucha manumiti bana**

⁵Aisamaira oquin mitsu masá nuitumitisama tanquinbi cana mitsu cain, an ñu 'atima 'acë unin ca 'ëishima micamaribi masá nuitumiaxa. ⁶Timéxunmi mitsun 'ën mitsu cacësa oquin 'acë uni a camina usashi oxun ënti 'ain. ⁷Usaquin 'acëxa sinanatia camina aín 'acë ñu manuquin a nuibaquin aín masá nuitucë nëtémiquin, upí oqian sinánun 'aquinti 'ain, axa 'aisamaira masá nuituti rabanan. ⁸Usaquin 'aquin camina axribia mitsubë timénun canan mitsun camina a nuibati quixuan 'unánun abë upíonanti 'ain. ⁹Aséribi caramina Jesucristo cuëncë sabi oquin 'aquin, 'ën mitsu cacë bana cuaquin 'ati 'ai quixun 'unánuxun, cana a quirica mitsu buánmian. ¹⁰Usoquin 'aquinmi mitsun aín 'ucha manuquin,

aribi manumicëbëtan, cana 'ënribi aín 'ucha manuín. Axa 'ëmi 'uchacëbi cana mitsúnmi aín 'ucha manucë cupí, 'ënribi aín 'ucha manuán, Cristo cuëncësabi oquin. ¹¹Usoquin manucëma 'icë ca ñunshin 'atimanën 'apu, Satanás, an nu 'atimaquin sinánmiquin 'atimamiti 'icën. Usa ca ax 'icë quixun cananuna 'unan. An usoquin nu 'atimaquin sinánmiti rabanan cananuna aín 'ucha manuí a unibë upí 'iti 'ain.

Troasnuaxa Tito isíma Pablo bënëa

¹²Troas ëmanuxun Cristo ñuiquin bana ñuixunux bëbatancëxun, ax cuëncësabi oquin 'ën ñuixuncëxun cuati ca unicama cuëëanxa. ¹³Cuëënia ñuixunti 'aíshbi cana nucën xucën Titobë mërananxma bënëti, anu 'icë unicama ëbiani, Macedonia menu cuan.

**Cristomi catamëti aín
unicama cushi 'iti bana**

¹⁴Ñunshin 'atimanëan nu 'atimaquin sinánmisa tanan aín bana ñuixunxunma 'anun 'imitisa taniabi ca Nucën Papa Diosan, Cristo Jesús cupí, nun 'acësabi oquinu aín bana ñuixunun nu 'imia. An ca aín 'acësabi oquin nu 'aquinia quixun 'unánquin cananuna —asábi ca —quixun caquin a rabin. Uinu caranuna cuani, anuxun ca nun nu Cristo Jesús ñuiquin aín bana ñuixunia, a banax ca aséribi upíira 'icë quixun unin sinania. ¹⁵Nun Cristo ñuiquin aín bana unicama nuibaquin ñuixuncëbë ca Nucën Papa Dios cuëënia. Nun nu ñuixuncëxun cuatia rafrí uni ainan 'inun iémicë 'imainuan rafrí unix ami sinántisama tani iémicëma 'aínbi ca Nucën Papa Dios nun nu a unicama nuibaquin aín bana ñuixuncëbë cuëënia. ¹⁶Axa ami sinántisama tancë unicamax ca nun nu Cristo ñuixuncëxun cuatíbi cuëënia, xëñibua 'aínbi Nucën Papa Diosbëma 'iti

'icën. Usa 'aínbi ca axa ami sinántisa tancë unicamax nun nu Cristo ñuixuncë xun cuati, ami catamëti —usai 'inux iëmicë 'aish cana xëñbua 'aínbi Nucën Papa Diosbë 'iti 'ai —quixun 'unani cuëëña. ¿Usoquin unicama sinánmiquin bana ñuixunti cara uin 'ati 'ic? ¹⁷Itsa unin ca curíqui biti cupíshi Nucën Papa Diosan bana ñuixunquinbi a bana quicësa oquin ñuiquinma bëtsi oquin ñuixunia. Usa 'aíshbi cananuna nux a unicamasama 'ain. Usa 'ixun cananuna Cristonan 'ianan Nucën Papa Diosan nu aín bana ñuixunun caíscë 'ixun, axa cuëëncësabi oquin aín bana unicama ñuixunin.

**Anun uni upí 'aish ainan 'iti
Nucën Papa Diosan mënío bana**

3 ¹¿Ësaquinu mitsu cacëxun caramina nux cananuna nubi rabiacati quixun sinanin? Usama ca. Uni raírinën 'acësa oquin cananuna mitsu isi cuanquin, uisa uni caranuna nux 'ai quixun 'acë quirica buántima 'ain. 'Anan cananuna usa quiricami nu 'axunun quixun mitsu catima 'ain. ²Usaquin 'acë quirica isquinmabi ca nun nu mitsu bana ñuixuncë cupí unin mitsu isquin nux caranuna uisa uni 'ai quixun 'unánti 'icën. ³Nun cananuna usoquin mitsu 'unánmia quiáxa quicë bana ax ca quiricanu tintan 'anan maxax paránu 'acëma 'aíshbi Cristo cupía Nucën Papa Diosan Bëru Ñunshin Upitan mitsun nuitunu 'imicë 'icën.

⁴Nucën Papa Diosan ca Cristo cupí mitsu aín bana ñuixunun nu 'aquianxa quixun 'unánquin cananuna usaquin sinanin. ⁵Nun cushínbi cananuna Cristo ñuiquin mitsu bana ñuixuan quixun cananuna sinaniman. Nucën Papa Diosan 'amicëxuinshi cananuna mitsu aín bana ñuixuan. ⁶Moisésnën usafa judíos unicama 'iti ñuiquin cuëëño bana

ca quia, a bana quicësabi oi 'icëma 'aish ca uni Nucën Papa Diosbë 'itimoí bamati 'icën. Usa 'aínbi ca a banama bana ió, a ñuixunun Nucën Papa Diosan nu 'imiáxa. A banax ca quia, aín Bëru Ñunshin Upitan 'imicëx ca uni ainan 'aish xëñbua 'aínbi Nucën Papa Diosbë upí 'iti 'icën.

⁷Aín bashinuax maxax paránu Nucën Papa Diosan cuëënocë bana a 'unánquian unin, 'uchati ca 'aisama 'icë quixun sinánti, a bëi atu 'inani aia ca Moisés Israel unicaman aín bëmánan ichúquin bëténancëxun ami racuéquin ñachama 'icën. Usai 'ia iscasmacëxbi ca aín ichúcë ax munuira munu nëtébuacëxa. ⁸A bana Nucën Papa Diosan Moisés 'inan, asamaira ca —Cristo cupí ca uni aín 'uchacama tërécë 'ianan Nucën Papa Diosnan 'aish aín Bëru Ñunshin Upínu 'ia —quicë bana ax 'icën. ⁹Moisésnëan uni 'inan banaxa upíra upí 'aínbi ca a bana quicësabi oquin 'acëma 'aish uni Nucën Papa Diosan 'uchocë 'ia. Usa 'aínbi ca a ñuí quicë bana cuati Cristomi catamëti aín 'ucha tërécë 'aish uni Nucën Papa Diosan 'uchocë 'ima. Usa 'ain ca Moisésnën cuëëño banasamaira 'aish Cristo ñuí quicë banax upí 'ia. ¹⁰Moisésnëan uni 'inan banaxa 'iásamaira oi ca Cristo ñuí quicë bana upí 'icën. ¹¹Nucën Papa Diosan 'inancë bana uni 'inancëbë ichutibi ca Moisésnën bëmánan bënëtishi aín ichúcë nëtébuacëxa. Usa 'ainbi ca Cristo ñuicë bana axira bëtsi banasamaira upí 'ain uisa ami catamëtia uni upí 'iti ax nëtëtima.

¹²Cristo ñuí quicë banaxa nëtétimoí upí 'ain, usai 'i ami catamëtia ca uni upí 'iti nëtëtima quixun asérami 'unánquin cananuna rabínquinma unicama ñuixunin. ¹³Aín bëmánan ichúcë axa nëtëtiamá Israel unibunën isia quiax ca Moisés bëmápucüacëxa. Moisés usai 'ia

'aínbi cananuna nux usai 'ima. ¹⁴Israel unibunën ca uisashi oquin cara Nucën Papa Diosan atu upí 'imitisa tancëxunbi 'unánma 'icën. Usa 'aish ca bëmápucucësa 'iacëxa. Bërí nèténribi ca a bana isquinbi cuatima. Cristomi catamëquin cuni ca unin, uisashi oquin cara Nucën Papa Diosan Moisés 'inan bana quicësabi oi 'inun aín unicama 'imiti 'icë quixun 'unánti 'icën. ¹⁵Bërí nèténbi ca Moisésnën cuëñëo bana isquinbi uisashi oquin cara Nucën Papa Diosan aín unicama 'imitisa tania quixun 'unanima. ¹⁶Usa 'aínbi ca, Nucën 'Ibu Jesús ca asérabi Cristo 'icë quixun sinánan ami catamëquin cuni 'unánti 'icën. ¹⁷Nucën 'Ibu Jesucristonën sináncësaribi oquin ca Nucën Papa Diosan Bëru Ñunshin Upitan sinania. Usa 'ain ca axa Jesucristomi catamëcë unin Nucën Papa Diosan Bëru Ñunshin Upitan 'imicëxun, upí oquin uisashi oquin cara Nucën Papa Diosan aín unicama 'imiti 'icë quixun 'unánan, Nucën Papa Dios quicësabi oi 'i cuëñënia. ¹⁸Usa 'ain cananuna bëmápucucësama 'ixun, Jesús ca asérabi Cristo 'icë quixun 'unani ami catamëti ainan 'ain. Barían pëcaquin espejo ichucësaribi oquin ca Jesucristonënbi asaribi 'inun aín upí nu 'inania. Usaquian nu 'acëx cananuna bërámanu 'á ñucama ëuncubiani Jesucristo cuëñcësabi oi bëtsi sinánñu 'aish, asaribi 'in. Aín Bëru Ñunshin Upitanbia 'imicëx cananuna usai 'in.

4 ¹Ësoquin cana mitsu cain, 'uchañuira 'icëbi nuibaquin sinanamixun ca Nucën Papa Diosan aín bana uni ñuixunun nu 'imíaxa. Usa 'ain cananuna masá nuituquin ënquinma aín bana uni ñuixunin. ²Uni itsimi unéxunu 'acë ñucama ënquin cananuna a 'aínu rabínti ñu 'atimaribi 'aiman. Uni paránti sinánquinma cananuna Nucën Papa Diosan banaribi bëtsi oquinma ax

asérabi quicë banaishi uni ñuixunin. Usaquin ñuixunia cuaquin ca camabi unin 'unánti 'icën, Nucën Papa Diosan iscëxun cananuna ax quicësabi oquin aín bana ñuixuni quixun. ³Nun nu Jesucristomi catamëti ca uni Nucën Papa Diosnan 'iti 'icë quixun uni ñuixuncë 'aínbi sapi ca axa Jesucristomi catamëti iétisama tancë unicaman a banax ca upí oquin cuaisama 'icë quixun sinánti 'icën. ⁴Usaquin sináncë unicaman ca ñunshin 'atimanën 'apúan sinánmicëxun, uisairai cara aín 'ucha téréncë 'aish Nucën Papa Diossaribi, Cristo, ainan 'iti 'icë quixun 'unanima. ⁵Nuxbi ñuiacaquin cananuna unicama bana ñuixuniman. Usoquin cananuna —Jesucristo ax ca Nucën 'Ibu 'icë —quixun unicama bana ñuixunin. Nuxbi ñuiacaquinma cananuna Jesús, an nu nuibacë, an nu sinánmicësabi oquin aín bana mitsu ñuixunin. ⁶Nucën Papa Dios axa bëráma, “Bëanquibucë ca pëquiti 'icë” quiá, anbi ca Cristonëan nun nuitu mëúxun nu chuámashi tani cuëñquinu uisaira upí cara Nucën Papa Dios 'icë quixun 'unánun 'imíaxa.

Jesucristomi catamëtishi uni upiti tsóti bana

⁷Nun cushínbi 'atsínxunmabi cananuna an 'amicëxuinshi ax cuëñcë sabi oquin 'ati 'ai quixuan unicaman 'unánun ca Jesucristo cupí Nucën Papa Diosan nux abë upí 'ixúnu aín cushínbi ñu 'anun nu 'imía. ⁸Unían nu 'atimocëxbi cananuna Nucën Papa Diosan nu 'aquincë cupí asábi 'ain. Uisa ñu cara 'icëbëbi cananuna sináncasmai bënëtiman. ⁹Unin bëtsi bëtsi oiabi ca Nucën Papa Diosan nu ënima. Unin bamatanun quixun mëcëxbi cananuna bamaiman. ¹⁰Uinu caranuna cuani anuax cananuna Jesús 'iásaribiti, camabi nètën tëmërai unin bëtsi bëtsi

ocë 'ain. Usaínu 'iabia Jesusan nubë 'ixun nu 'aquinia ca camabi unin isti 'icën. ¹¹Jesusan ca nu iémiquin 'aquinia quixun camabi unin isnun ca nun aín bana ñuixuncëbë uni raíri nètétima nu bamamicatsi quiax 'ésénania. ¹²Aín bana ñuixuncë cupí nu bamamisa tani uni numi ésénanmainunbi camina mitsux nun nu ñuicë bana cuati Jesúsmi catamëti nètétimoí Nucën Papa Diosnan 'inux iécë 'ain.

^{13,14}Cananuna 'unanin, Nucën Papa Dios, an Nucën 'Ibu Jesús bamacëbi baísqumia, an ca usaribi oquin nuribi ainan 'icë Cristo utécëncëbëtan baísqumiti 'icën. Baísqumitancëxun ca mitsubënu abë aín nètënu 'inun nu 'imiti 'icën. Usaquin 'unánquin cananuna —ainan 'inun an nu iémicë 'ixun ca Nucën Papa Diosan nu 'aquinia —quixun unicama cain, bëráma Nucën Papa Diosan 'amicëxun aín unin ésaquin cuëñeosabi oquin: “Nucën Papa Diosan ca 'è 'aquinia quixun 'unánquin cana camabi uni —usa ca —quixun can”.

¹⁵Nun tëmëraquinbi mitsu bana ñuixuncëx camina 'itsaxira Nucën Papa Diosan nuibaquin 'aquincëx ainan 'aish cuëënin. Usai 'iquin camina mitsun 'itsaxuinra Nucën Papa Dios —asábi ca —caquin a rabin, Nucën Papa Dios cuëënu.

¹⁶Usa 'ain cananuna masá nuituquinma aín bana ñuitiribi ëniman. Nucën nami axa abiira abi xëñibucëbë tanbi ca Nucën Papa Diosan camabi nètën ami catamëti cuëënu nu cushioia. ¹⁷Cananuna 'unanin, ënë nètënuaxnu tëmëracë 'ainbi ca a ñucamax bënëtishi cëñutia. Tëmëracëbi ca nun sináncësamaira oquin Nucën Papa Diosan nux tëmëracë cupínu abë 'aish chuámarua tani cuëëinra cuëënu nu 'imiti 'icën. ¹⁸Usa 'ixun cananuna nun bërúnbi iscë ñu 'aisamaira oquin sinánquinma unin iscëma ñu, uni

nuibati, cëmëi banatima, upí sinánñu 'iti, acama sinanin. Nun bërún nu iscë ñucamax ca cëñúti 'icën. Usa 'ainbi ca unin aín bërún iscëma, nun nuitu mëúnu sináncë ñucamax, Nucën Papa Dios rabití, uni 'aquinti, acamax cëñútima 'icën.

5 ¹Cananuna 'unanin, bëráma unin 'á 'aísha xubu chëquicësaribiti ca nun nami anu nun bëru ñunshin 'icë ax 'ia. Usaía nun nami 'iti 'ainbi ca Nucën Papa Diosan chëquitimoínu anu abë 'iti a aín nètënu nu mënioxuanxa. Ax ca unían 'acëma 'icën. ²Usai cananuna Nucën Papa Diosan nètënu 'iti 'ai quixun 'unani cananuna asérabi ënë nètënuax anu cuainsa tani bënëtín. ³Anuax cananuna ënë namima bëtsi namiñu 'iti 'ain. ⁴Ënë nètënu 'aish cananuna paë tani masá nuituti bënëtín. Usa 'aish cananuna ënë namiñuma bëtsi nami bamatima, axa usabii 'iti, aañu 'iti cuëënin. ⁵Usaínu 'inúan an nu 'imicë ax ca Nucën Papa Dios 'icën. An ca, usai cananuna 'iti 'ai quixúnu 'unánun aín Bëru Ñunshin Upí nubëa 'inun nu 'ináncëxa.

⁶Usa 'ain cananuna an ca aín quicësabi oquin nu 'imiti 'icë quixun sinani, Nucën Papa Diosmi catamëti bënëtíman. Ënëribi cananuna 'unanin, ënë nètënu 'aish, nun nami, nun xo acamax ió 'icëma pain 'aish, cananuna Nucën 'Ibu Jesús bë aín nètënuirama pan 'ain. ⁷A isímabi cananuna ënë nètënuax ami catamëti ax cuëëncësoi 'in. ⁸Usa 'aish cananuna —an ca abë 'inun nu 'imiti 'icë —quixun 'unani chuámarshi tani cuëënin. Usai 'i cananuna ënë nètënu 'ima Nucën 'Ibu Jesús bë aín nètënu 'iisa tanin. ⁹Usa 'ain cananuna ënë nètënu 'aish 'icësaribiti aín nètënu-xunribi ax cuëëncësa oquin ñu 'ati cuëënti 'ain. ¹⁰Utécëntancëxun ca Cristonën unicama achúshi achúshi uisaquin cara ënë nètënuaxun ñu 'axa

quixun isti 'icën. Usoquin ca, atun ñu 'acë cara upí 'icë, cara upíma 'icë quixun isti 'icën. Atun ñu 'acësabi oquin istancëxun ca raíri ax cuëncësabi oquin 'acë, axa cuëñun 'imianan raíri an aín bana quicësabi oquin 'acëma uni a uisoquin cara 'ati 'icë usoquin 'ati 'icën.

**Uisai cara uni chuámarua
'iti 'icë quicë bana**

¹¹Usaquin ca Nucën 'Ibu Jesucristonën unicama ashúshi achúshi isti 'icë quixun 'unánquin cananuna ami racuéquin camabi unínribi 'unánun a ñucama ñuiquin bana ñuixunin. An nu sinánmi-cësabi oquin cananuna bana ñuixuni quixun ca Nucën Papa Diosan 'unánxa. Usaquinu 'aiami mitsúnribi 'unánti cana cuëñin. ¹²Nuxbi rabíacatécëni banaquinma cananuna mitsun uisa caranuna nux 'ai quixun 'unánquin axa nu ñui banacë unicama canun quixun usaquin mitsu can. A unicaman ca —nux cananuna upí 'ai —quixun uni sinánmisa tanquinbi aín nuitu upí 'iti sinanima. ¹³Uni raírinëan, nux cananuna ñunshíncësa 'ai quixun sinánmainunbi cananuna Nucën Papa Dios ax cuëncësabi oquin ñu 'ain. Usaribi oquin cananuna raíri unínribia, nux cananuna ñunshíncëma asábi 'ai quixun sinánmainun, mitsúxmi upiti Nucën Papa Diosmi sináncë 'inun, aín bana mitsu ñuixunin. ¹⁴Cristonën ca camabi uni 'itsaira nuibatia quixun 'unánquin cananuna a sinánquin —usa ca —quixun atu cain. Cananuna 'unanin, ax achúshi 'aishbí ca Nucën Papa Dios cuëncësabi oi camabi unin 'ucha cupí bamacëxa. Usaía Cristo 'iá 'ain, cananuna tēmëraíbi nux cuëncësabi oi 'ima, ax cuëncësabi oi 'iti 'ain. ¹⁵Aín unicamaxa ëñë nētēnuax atux cuëncësa oi 'ima, ax cuëncësabi oi 'inun ca Cristo, axa atu cupí bamatancëx

baísqüia, ax camabi unin 'ucha cupí bamacëxa. ¹⁶Bëráma uni isquin, ax ca unishi 'icë quixun sinan 'ixunbi cananuna bërí, uisa uni cara, —axribi ca Jesucristonan 'iti 'icë —quixun sinanin. Usaribi oquin —Cristo ax ca unishi 'icë quixun sinan 'ixunbi cananuna bërí Cristo ax ca asérabi Nucën Papa Diosan Bëchicë, an nu ainan 'inun iémicë, a 'icë quixun 'unanin. ¹⁷Usa 'ain ca uinu 'icë unix cara Cristomi catamëtia ax Cristobë 'aish bëtsi uni 'icën. Usa 'ixun ca bëráma 'acësa oquin sinántécënima. Bëtsi oquin ca sinania.

¹⁸Nucën Papa Diosan 'imicëx ca axa Cristomi catamécë uni usai 'ia. Cristo cupí nux abë upí 'inun ca Nucën Papa Diosan nu 'imiacëxa. 'Imianan ca camabi uníxa abë upí 'inun aín bana ñuixunun nu 'imiacëxa. ¹⁹Ëñëx ca ësa 'icën: Nucën Papa Diosan ca Cristo cupí camabi uni abë upí 'inun mēñócëxa. Mēñónan ca atun ñu 'atima 'acëcama a sinántécënuunma tērēnxuanan, nun aín bana anun unicama abë upí 'inun ñuixunun nu cacëxa. ²⁰Nux Cristonën 'imicë 'ixun cananuna an sinánmicësabi oquin mitsu ësaquin cain, Nucën Papa Dios anbia mitsu cacësa 'inun: Nucën Papa Diosbë upí 'inux camina mín 'uchacama tērēncë 'inun Jesucristomi catamëti 'ain. ²¹Cristo axa añu 'uchañumabi 'icëbi ca nun 'uchacama tērēncë 'inúan, nun 'ucha bitsi 'uchañuirasa 'inun Nucën Papa Diosan 'imiacëxa, nux an iscëx 'uchañuma 'inun. Nuxnu abë 'imainuan Cristo axribi nubë 'icëbëtanu ax cuëncë sabi oquin 'anun ca Nucën Papa Diosan nun 'uchacama a 'inancëxa.

6 ^{1,2}Nucën Papa Diosan bana cuëñëo ca ësai quia:
Anúnmi 'ë ñucacë nētën cana min
bana cuan. Cuaquin cana anúnmi
'ënan 'inux iéti nētën mi iémian.

A bana quicēsabi oi ca bḗrribi anúan mitsun ñucácēxun cuati nētē a 'icēn, bḗrribi ca anúan mitsu ainan 'inun iémiti nētē 'icēn. Usa 'ain cananuna Nucēn Papa Diosbḗtan mitsu cain, an mitsun bana cuanan 'aquinsa tancēxun camina an mitsu 'aquinun axa cuēēncēsabi oquin a ñucáti 'ain.

³Uinu 'icē unínbia nun bana —'aisama ca —quixun caquin cuaisama tanunma cananuna ñu 'atima 'aquinma Nucēn Papa Dios cuēēncēsabi oquinshi 'ain.

⁴Bḗtsi bḗtsi onan numi nishquin unin tēmēramicē 'ianan uisa ñu cara 'icēbḗbi bḗnēquinma tanshiquin Nucēn Papa Diosan bana ñuixunia isquin ca camabi unin 'unánti 'icēn, nux cananuna asérabi Nucēn Papa Diosan uni 'ai quixun.

⁵Unían nu mēēanan sipuanan raíri uni numi tsuáquirumimainun 'aisamaira oquin ñu mēēanan, 'uxti tēanan 'acēñuma 'aish panancē 'ixunbi cananuna bḗnēquinma tanshitin. ⁶Usa 'ixun ñu 'aisama 'ati sinánquinma Nucēn Papa Diosan bana 'unáncē 'ixun ami nishíma unibē asérabi upí 'ianan Nucēn Papa Diosan Bḗru Ñunshin Upitan sinánmicē 'ianan, paránquinma asérabi uni nuibanan ⁷bḗtsi bana ñuixunma, an cushiocēxuinshi aín bana ñuixunia isquin ca nux cananuna asérabi Nucēn Papa Diosan uni 'ai quixun camabi unin 'unánti 'icēn. An iscēx nun nuitu upí 'ixun cananuna racuḗquinma uni itsiribi Cristomi sinánun 'aquinti 'ain. Usoquin 'aia ca numi manánquinbi unin 'unánti 'icēn, nun cananuna ñu 'aisama 'acēma 'ai quixun. ⁸Raíri uni nu ñu —a unicamax ca aín nuitu upí 'icē —quimainun raírinḗxribishi nu ñu 'atimati banaia. Usaribitia raírinḗx nun isanuna Nucēn Papa Diosan bana upí oquin ñuixuni quimainun ca raírinḗxribi nun isanuna Nucēn Papa Diosan bana 'unáncēma 'ai quia. Usaribiti ca raíri

uníxa —Pablonḗn bana ca asérabi 'icē —quimainun raírinḗxribishi —a banax ca cēmē 'icē —quia. ⁹—Uínbi 'unáncēma ca a uni 'icē —quiax nu ñu quicancēbḗbi ca raíri —nun 'unáncē ca Pablo 'imainun abḗ 'icē unicama 'icē —quia. Bamatisa 'aishbi cananuna iéan. Usai 'ínu upiti ami catamḗti 'unánti cupía Nucēn Papa Diosan nu castican-cḗxbi cananuna bamacēma 'ain. ¹⁰Masá nuitucḗ 'aishbi cananuna chuámaruishi 'ain. Ñuñuma 'ixunbinu Cristo ñuixun bana ñuixuncḗx ca an a bana cuacḗ unicamax uni ñuñu 'icēsamaira oi chuámarua tani cuḗenia. Ñuñuma 'icḗbi ca Cristonḗn nubḗ 'ixun ax cuḗencēsabi oínu anun 'inun nu ñu 'inania.

¹¹Corintonu 'icē nucēn xucéantu, asérabi mitsu nuibaquin cananuna nux 'icēcama 'imainun nun sináncḗ ñucamaribi mitsu ñuixuan. ¹²'Itsaira mitsu nuibaquin nun cacēsaribi oquin mitsun nu nuibaquin cati sináncḗbetanbi camina nu cacēma 'ain. ¹³Usa 'icḗ cana unían aín bḗchicḗ cacēsaribi oquin mitsu cain, 'ḗn mitsu 'acēsaribi oquin camina 'ḗribi nuibacanti 'ain.

Nux cananuna anu Nucēn Papa Dios 'icḗ a 'ai quicḗ bana

¹⁴An ñu upíshi 'acḗ unin sináncēsaribi oquin ca an ñu 'aisama 'acḗ unicaman sinaníma. Usa 'ain camina mitsux Jesucristomi catamḗcḗ 'ixun axa Jesucristomi catamḗcēma unicamabḗtan atun cuḗencḗsa oquin ñu 'atima 'ain. Nētḗx ca imḗbḗ mḗscutíma. Usaribiti ca Cristonḗn unicamax Cristonanma unicamabḗ nuianantima 'icḗn. ¹⁵¿Cristonḗn cara ñunshin 'atimanḗn 'apúan sináncḗsa oquin sinanin? Usaquin ca sinaníma. ¿Axa Cristomi catamḗcḗ unin cara axa Cristomi catamḗcēma unin sináncēsaribi oquin sinanin? Usaquin ca sinaníma. ¹⁶¿Anuxun Nucēn Papa Dios

rabiti xubunuxun cara atúnbi 'acé ñu unin rabiti 'ic? Ca 'atima 'icën. Nucën Papa Dios, ax bamatimoi tsócé, a aín unicaman rabicë, ax ca mitsunu 'icën, axa ësai quiásabi oi:

'Èx cana atubëbi 'ianan uinu cara atux cuania anuribi atubë 'iti 'ain. 'Èx cana aín Dios a atun rabiti a 'ain, atux ca 'ën unibu 'iti 'icën.

¹⁷Èsairibi ca Nucën 'Ibu Diosan bana quia:

Axa 'ëmi sináncëma unicamabë 'ima 'ianan camina atun sináncësaribi oi 'icantima 'ain. Usai 'iquin camina 'ëx cuëncëma ñu 'atima 'ain. Usai 'ia cana 'ënan mitsu 'imiti 'ain. ¹⁸Imianan cana mitsun Papa 'iti 'ain. 'Icëbë camina mitsux, bëbu 'imainun xanucamaxribi, 'ën bëchicë 'iti 'ain. Usai cana mitsun 'Ibu Dios, cushiira, 'ëx quin.

7 ¹Èn nuibacë xucéantu, a banacama nun cuanun ca Nucën Papa Dios quiacëxa. A banacama 'unánquin cananuna nun sinanën upíra oquin sinánan nun nuituribi upí 'ianan nun 'acé ñuribi upí 'inun camabi nètën bërúancati 'ain. Usai 'i cananuna aín bana cuati ainanshi 'aish ax cuëncësabi oishi 'iti 'ain.

Corintonu 'icë unicamaxa sinana bana

²Mitsun nuitunëni camina upí oquin sinánquin nu nuibati 'ain. Mitsu achúshibi cananuna uisa ocëma 'ain, mitsu achúshibi cananuna 'atimaquin sinánmicëma 'ain, mitsu achúshibi cananuna paráncëma 'ain. ³Uchoquin cana mitsu caiman. Bëráma cacësabi oquin cana mitsu catëcënin, cana 'aisamaira mitsu nuibatín. Mitsux cuëncëbë cana 'ëxribi cuënin, mitsux masá nuituti tëmëracëbë cana 'ëxribi masá nuituti tëmëracësa 'ain. ⁴Mitsun

camina upí oquin 'ai quixun sinani cana cuëënin. Usa 'aish cana, nux tëmëraquinbi mitsun upí oquin 'aia cuati, chuámarua tani cuëënin.

⁵Macedonia menu uax cananuna upíma 'aish masá nuituan. Ènuax cananuna 'aisamaira tëmëran, numi uni nishcë cupí 'ianan mitsucëñun Titoribi sinani masá nuituti. ⁶Usai 'iabi ca Nucën Papa Dios, an uni tëmërai masá nuitutiabi chuámarua 'inun 'imicë, an Tito mitsunuax ènu unun mënfoxun nu chuámarua 'imiixa. ⁷Tito ucë cupíshima, an mitsu ñuiquin 'ë cacë bana aribi cuati cananuna chuámarua tani cuëëan. Mitsunuax uxun ca Titon nu caxa, axribi masá nuituti cuanxbisa mitsu isi cuëëanxa quixun. Nux mitsu isi cuanti cuëëanmí 'ën mitsu quiricanu cacë ñucama sinani masá nuitutími 'itsaira 'ëmi sináncancë, acama Titon ñuia cuati cana cuëëan.

⁸A quirica buánmixun cana mitsu masá nuitumian. Usa 'aínbi cana, a quirica buánmiti ca 'aisama 'icë quixun pain sinánxunbi bërí 'unanin, 'aisamairai camina masá nuitucancëma 'ai quixun. ⁹Mitsúxmi 'ën buánmicë quirica isi masá nuitucë cupíma, mitsúnmi masá nuitutan-cëxunbi sinanacë cupí cana cuëënin. Nucën Papa Dios cuëncësabi oi camina usai 'ican. Usa 'ain ca nun mitsu buánmicë quirica an uibi 'atimaquin sinánmicëma 'icën. ¹⁰Aín 'uchacama cupí masá nuitutan-cëxa uni sinanati ca Nucën Papa Dios cuëënia. Sinanatan-cëx ca aín 'ucha tërëncë 'aish Nucën Papa Diosnan 'inux iécë 'ia. Usai 'itancëx cuëënquin ca —'ëx 'ën 'uchacama sinani pan masá nuituti ca asábi 'iixa —quixun sinánti 'icën. Usa 'aínbi ca uni raíri aín ñu 'atima 'acé cupí masá nuituquinbi acama èni ami sinanacëma 'aish Nucën Papa Diosnan 'ima. ¹¹Nucën Papa Dios cuëncësabi oi masá nuitutancë xun camina 'ën mitsu cacë bana upí oquin sinan. —Sinanima cananuna usai 'ia

—quixun sinánan —ami rabínquinma an 'aisama ñu 'acé uni 'axunma 'anun cacéma 'aish cananuna 'aisama 'ai —quixun sinani racuéquin camina upí oquin mênfoti sinan. Camina 'ên mitsu isi cuanti cuëënan, an ñu 'aisama 'acé uni upía 'inun 'ë mitsu cacésabi oquin 'aquian. Mitsun camina 'ên mitsu cacé ñucama upí oquin mênío quixun cana 'unanin. ¹²Ën mitsu quirica buánmiquin cana an ñu 'atima 'acé uni ashi sinánquin cuëñocéma 'ain, ami ax 'uchacé uni aribishi sinánquin cana 'acéma 'ain. Nucën Papa Diosan iscëxun camina asérabi nu nuibaquin nun bana cuati quixunmi mitsun 'unánun cana a quirica mitsu buánmian. ¹³Usa 'ain cananuna acama sinani masá nuitutíma chuámarua tani cuëëan.

'Ianan cananuna Titóxribia usaími 'icancé bana ñui cuëënia isi cuëëinra cuëëan. Mitsun camina Tito chuámarua tanquian upí oquin sinánun 'imian. ¹⁴Mitsunua cuantánun Tito caquin cana —a unicamax ca upí 'icé —quixun mitsu rabiquin can. Nun nu Tito ñuiquin mitsu cacé bana axa cëmëma 'ain ca nun mitsu ñuiquin Tito cacé banacamaxribi cëmëma 'iixa. ¹⁵Mitsúnmi axa bëbaia aín bana cuaisa tanquin nuibaquin bicé, a sinánan an cacésabi oquinmi mitsun 'acé ñucama aribi sinánquin, ca an asérabi mitsu nuibatía. ¹⁶Usa 'ain cana, mitsun camina asérabi upí oquin sinánquin ñu 'ai quixun sinani cuëënin.

**II. AXA JERUSALENUAX
JESUCRISTOMI CATAMËCË UNICAMA
CURIQUI BUANMITIA PABLO QUIA
(8.1-9.15)**

'Aquinsa 'icé uni upí oquin 'aquinti bana

8 ¹Ën xucéantu, mitsúnmi 'unánun cana mitsu caisa tanin, Macedonia nëtënu 'icé unicamax ca ainan 'aish ësai

Nucën Papa Diosan sinánmicëx 'ia. ²Amia uni nishmainun bëtsi ñu cupíribi tëmëraquinbi Jesucristomi catamëti ëníma ca chuámaruishi 'aish bucuía. Chuámarua 'ixun ca ñuñuma 'ixunbi cuëënquin ñuñu unin 'acësa oquin curíqui 'inánxa. ³Ënbi cana uisoquin cara atun curíqui 'inánxa quixun 'unan. Cuëënquin ca a 'inánti a 'inánanbi ainan 'itia nancé aribi 'inánxa. ⁴Itsa oquin ca ëssoquin nu caxa:

—Nunribi cananuna axa Jerusalénuax Jesucristomi catamëcë unicama 'aquinquin curíqui 'inántisa tani —quixun. ⁵Nun sináncësamaira oquin 'aquin ca Nucën 'Ibu Jesús pain —nux minan 'ixun cananuna mix cuëëncésabi oquin 'ati 'ai —quixun catancëxun Nucën Papa Diosan sinánmicésabi oquin nun bana cuanan nun nu Jerusalénu buánun atun curíqui nu 'inánxa. ⁶Macedonianu 'icé unían 'acé sinánquin cananuna an bërâma mitsúnmi Jerusalénu buánmiti curíqui biquinbi sënëonma cupí, a sënëonquin bitsia isía cuanun quixun Tito xutin. ⁷Raírinëan 'acësamaira oquin camina upí oquin sinani Jesucristomi catamëanan, Nucën Papa Diosan bana 'unánquin a bana uni 'unánmiti 'unánan, asérabi chiquísh-quinma cuëënquin ñu 'anan, asérabi nu nuiban. Usáquin 'axun camina raírinëan 'acësamaira oquinribi Jerusalénu 'icé unicama nuibaquin atu buánmiti curíqui timëquin nanti 'ain.

⁸Usoquin 'ati cuëënquinmabimi 'anun quixun cana mitsu caiman. Macedonianu 'icé unicaman ca cuëënquin axa Jerusalénuax Jesucristomi catamëcë unicama curíqui 'inania quixunmi 'unánun quixuinshi cana mitsu can. Usoquin 'unánquin camina 'unánti 'ain, caramina asérabi Jerusalénu 'icé unicama nuibati 'ai quixun. ⁹Uisaira oquin cara Nucën 'Ibu Jesucristonën nu

nuibatia quixun camina 'unanin. Mitsúxmi chuámarua 'ianan aín nētènu xēnibua 'aínbi abē 'iti cupí ca ax aín Papan nētè upí ēbētsini ēnē menu ñuñuma 'inux uacēxa.

¹⁰Usa 'ain cana 'ēn mitsu cacē cupímami mitsúxbi cuēēnquin Jerusalénu 'icē unicama curíqui 'inánti sinan 'icē ésaquin mitsu cain: bētsi baritian camina mitsun curíqui 'inánti sinani cuēēancēn. Usaquin sinánxun atu 'inánti curíqui biquinbi camina sēnéoncanma 'ain. ¹¹Sēnéonma 'ixun camina bērí sēnéoncanti 'ain. Uiti curíquiñu caramina 'icanin, a camina mitsúnbi sinánquin, mēsú 'inánti 'ain. Mitsúxmi a 'ati sinani cuēēansabi oquin sēnéonquin 'inani camina cuēēncanti 'ain. ¹²Curíquiñu 'ixun unin 'inántisa tanquin 'inánti ax ca Nucēn Papa Diosan iscēx asábi 'icēn. Usaribiti ca curíquiñuma 'ixun unin 'inántisa tanquinbi 'inancēma, axribi Nucēn Papa Diosan iscēx asábi 'icēn.

¹³Atu curíqui 'inántancēxmi mitsux curíquiñuma 'inun cana mitsu caiman. Mitsux 'icēsaribitia atúxribi ñuñu 'iti cupíshi cana mitsu cain. ¹⁴Usa 'ain camina mitsux bērí ñuñu 'ixun ñuñuma unicama 'inánti 'ain. Usaribi oquin ca atúxribi ñuñu 'ixun mitsu ñuñuma 'icē 'inánti 'icēn. Usai 'i ca camabi uni ñuñu 'iti 'icēn. ¹⁵Usaribi oi ca Nucēn Papa Diosan bana cuēnēo éσαι quía: “An piti 'itsa bicē, ainan ca tēxēcēma 'icēn. 'Imainun ca an 'itsamashi bicē, anribi pucháquin piaxa”.

**Titocēñun abē 'icē unicama
ñui quicē bana**

¹⁶Nucēn Papa Diosan sinánmicēxun ca 'ēn 'acēsaribi oquin Titon mitsu nuibaquin 'aquinsa tania. An usaquin Tito sinánmicē cupí cana Nucēn Papa Dios —asábi ca —cain. ¹⁷Ēn mitsu isi cuantánun cacēx ca axribi cuainsaira

tani cuēēanxa. Usa 'aish ca ax cuēēncē sabi oquin mitsu 'aquinuxun isi cuania.

¹⁸Bētsi uniribi —an ca upí oquin Cristo ñuiquin bana ñuixunia —quixuan camabi ēmanuxun 'unáncancē, aribi cananuna Titobē cuanun xutin. ¹⁹A uni ca camabi ēmanuxun axa Jesucristomi catamēcē unicaman ēnē ñu mēēti nu 'aquinia nubē cuanun caísaxa. Mitsúnmi usouquin 'inancē isquian unicaman Nucēn 'Ibu Jesús rabinun cananuna ēnē curíqui bixun Jerusalénu 'icē unicama 'inani cuanin. ²⁰Unían nunan 'inun a curíqui biisa sinánquin nu ñuiti rabanan ca a uni nubē cuania. ²¹Nun cananuna ēnē curíquicama mēcamaquinma upí oquin buánti 'ai quixun Nucēn 'Ibu Diosan ismainuan unicamanribi 'unánti cananuna cuēēnin.

²²Tito 'imainun 'ēn mitsu ñuixuncē uni, acēñun cananuna bētsi uniribi mitsunu cuanun xutin. Ax ca Cristomi catamēcē 'aish nun xucēn 'ixun nu upí oquin ñu 'axúanxa. Mitsun camina Jerusalénu 'icē unicama curíqui buánmisa tani quixun 'unani ca axribi mitsu 'aquini cuainsa tania. ²³An 'unancēma unicaman —ui cara Tito 'icē —quixun ñucácēxun camina cati 'ain, —an Pablobētan ñu mēēquin mitsu 'aquinti uni ca ax 'icē —quixun. Canan camina abē cuancēcamaribi ñuiquian —ui cara —quixun ñucácēxun cati 'ain, acamax ca axa Jesucristomi catamēcē unicaman xucéxa cuancē 'icē quixun. Cristonēn 'imicē 'ixuan atun upí oquin ñu 'aia isquin ca —usa ca Cristonēn uni 'icē —quixun camabi unin 'unania. ²⁴Usa 'ain camina ēnē unicama upí oquin biti 'ain. Mitsun usaquin 'aia cuaquin ca camabi ēmanuaxa ax Jesucristomi catamēcē unicaman 'unánti 'icēn, mitsun camina acama nuibati quixun. 'Unánan ca nux mitsu ñui quicē bana ca aséribi 'icē quixun 'unánti 'icēn.

Axa Jerusalénuax Cristomi catamēcë unicama buánmiti curíquia Pablonën ñuia

9^{1,2}Cana 'unanin, 'ën cacëxunmabi camina mitsúnbi cuëenquin axa Jesucristomi catamēcë unicama curíqui buánmiti sináncancën. Usaquinmi sináncë cupí cana mitsu ñuiquin —bëtsi baritian ca Acaya menu 'icë unicaman curíqui timëti sinánxa —quixun Macedonia menu 'icë unicama can. Usaquin 'ën ñuia cuaquin ca Macedonianu 'icë unicaman mitsun 'acësaribi oquin 'ati sinánxa. ³Usa 'aínbi cana 'ën mitsu ñuiquin atu cacë bana cëmë 'iti rabanán, ënë unicama mitsunu cuanun xutin, 'ëx quicësabi oía mitsun curíqui mënfiocë 'iti cupí. ⁴Macedonianu 'icë unían 'ëbë mitsunu cuanxun iscëxbi nun sináncësabi oquin mitsun 'acëma 'ain cananuna rabínti 'ain. A ñucama mitsun sináncësabi oquin 'acëma 'aish camina nux 'icësamairai rabíncanti 'ain. Usaínu 'ítima cupí cana ënë unicama mitsunu cuanun xutin. ⁵Usa 'ain cana ënë unicama atux pain cuanxuan, mitsun sinánsabi oquin curíqui timëti 'aquinun quixun rëcuëonquin xuti sinan. Usoquin mitsun 'aia ca axa 'ëbë cuancë unicaman 'unánti 'icën, nun sinánmicë xunmabi camina mitsúxbi cuëenquin curíqui Jerusalénu 'icë unicama 'inani quixun.

⁶Ësa ca quixun camina sinánti 'ain, an ñu bëru 'itsama 'apácë uni, an ca aín bimiribi 'itsamaribi bitsia. Usaribi oquin ca an ñu bëru 'itsa 'apácë uni an aín bimiribi 'itsa bitsia. ⁷Usa 'ain camina mitsúnbi mitsun nuitu mëu upí oquin sinántancëxun 'inánti 'ain. Sinánquinbi 'inántisama tanquin camina 'inántima 'ain. Usaribi oquin camina uni itsían mi cacëxuinshi 'inántima 'ain. Nucën Papa Diosan ca an asérabí cuëenquin uni ñu 'ináncë uni a nuibatia. ⁸Nucën Papa

Diosan ca camabi ñu anúnmi mitsux ami sinani cuëëni bucuti mitsu 'inánti 'icën. 'Inánan ca anúnmi usaribi oquin bëtsi uniribi 'aquinun mitsu 'inánti 'icën. ⁹Usa 'ain ca axa ami sináncë uni ñui Nucën Papa Diosan bana cuëëno ësairibi quia:

Upí oquin sinánxun ca ñuñuma uni ñonquinma 'itsaira 'inánxa. Usoqian 'acë a ca Nucën Papa Diosan manuquinma xëñibua 'aínbi sinania.

¹⁰Nucën Papa Dios, an 'apátí ñu bëru uni 'ináncë, an ca 'apáxuan aín bimi piti oquin uni 'inania. Usaribi oquin ca anun uni itsi 'aquinti ñu mitsuribi 'inánti 'icën, camabi nëténmi anun upí oquin uni 'aquinun. ¹¹Usa 'ain ca ñonquinmami anun uni itsi 'aquinun Nucën Papa Diosan camabi ñu mitsu 'inánti 'icën. An 'ináncëxunmi mitsun buánmicë curíqui nun 'ináncëxun biquin ca Jerusalénuaxa ax Jesucristomi catamēcë unicaman —asábi ca —caquin Nucën Papa Dios rabiti 'icën. ¹²Usoquin 'aquinquin cananuna anun aín cuëëncë ñuñu 'inun 'inanin. Usaquin 'inánquin cananuna —asábi ca —caquin rabia Nucën Papa Diosmi sinánun acama 'aquinin.

¹³Usoquin mitsun 'aquincëxun ca a unicaman —mitsun camina Cristonan 'ixun aín cuëëncësabi oquin 'ai —quixun sinánquin Nucën Papa Dios rabiti 'icën. Rabianan ca mitsun camina atu 'imainun uni raíriribi ñonquinma ñu 'inani quixun sinánquin Nucën Papa Dios —asábi ca —cati 'icën. ¹⁴Usaribi oquin ca, Nucën Papa Diosan nuibaquin 'aquincëxunmi mitsun curíqui 'ináncë cupí, atun mitsu nuibaquin Nucën Papa Dios ñucáxunti 'icën. ¹⁵¿Nucën Papa Diosan aín Bëchicë achúshi nu iéminuxa bamanun xuá, a sinani caranuna uisairai quiti 'ain? A sinánquin cananuna cuëenquin —asábi ca —caquin 'itsaira rabin.

III. JESUCRISTONËN AÍN BANA
ÑIUXUNUN CAISCË UNI ÑIUIQUIN
PABLONËN CA (10.1-13.14)

—Aín bana ñiuxunun Jesusan cá cana 'ëx
'ai —quíaxa Pablo quia

10 ¹Ëx Pablo 'icë Cristonën sinánmicëxun an 'acësaribi oquin mitsu nuiباقuin upí oquin cati cana cuëënin. Uni raírinëx caísa quia, 'ëx mitsubë 'aish isana mitsu ñu caíma upitishi banain. Bëtsi émanuxun quirica buánmiquin cuni isana ñu caquin cacësa oquin mitsu cain. ²Usai quicëbëtanbi cana mitsu cain, mitsu isi cuanquin, 'ën isna axa 'ëbë nicë unibëtan, Nucën Papa Diosan sinánmicëma, nunbi sinánxun bana uni ñiuxuni quixuan an nu ñuicë unicama, abë banaquin cati cana sinanin. 'Ën mitsu isi cuanxun ñu caquin catima cupía upitishi bananun camina a unicama uisa cananuna nux 'ai quixun upí oquin 'unánmiti 'ain. ³Aséribi cananuna nux unishi 'aíshbi ënë nëtënu 'icë unicama 'icësaribiti 'acanáman. ⁴Usa 'aish cananuna ënë nëtënuaxa anun suntáru 'acánancë ñu anúnribi nux 'acanáman. Nucën Papa Diosan cushínshi cananuna axa ami nishcë unicama usai 'iaxma 'inun nëtémiti 'ain. ⁵Usaribi oquin cananuna unían 'atimaquin nu ñuicë bana, 'imainun unin anbi sinánquin, Nucën Papa Diosan bana cuaxunma 'anun caquin 'atimaquin sinánmicë banacamari, Nucën Papa Diosan cushínshi ñancáishi 'itánun nëténti 'ain. Usa 'ain cananuna aín cushínbia 'imicëxun Cristo cuëëncë sabi oquinshi 'ati sinanin. ⁶'Ën mitsu cacë ñucamami mënfoquin sënëoncëbë mitsunu cuanquin cananuna an Nucën Papa Diosan bana cuaisama tancë unicama sinananun 'esëquin, atun

'aisama ñu 'acë a ëinsama taniabi ëmiti 'ain.

⁷Mitsun camina uisaira caranuna nux 'ai quixun isti 'ain. Aséribi camina Cristonan 'ai quixun sinánquin camina 'unánti 'ain, nuxribi cananuna Cristonan 'ai quixun. ⁸Nucën 'Ibu Jesucristonën ca aín bana mitsu ñiuxunun 'ë cacëxa, masá nuitumiquin 'uchoquin ñu caquinma ax quicësabi oquin 'anun mitsu 'unánminun quixun. Usoquin 'anuan Jesucristonënbi 'imicë 'aish cana 'itsa oquin mitsu caíbi rabiniman. ⁹Racuéoti cupí cana mitsu quirica buánmi quixunmi sináncanti cana cuëëniman. ¹⁰Uni raírinëx caísa quia, 'ën quiricanu cuëënocë bana ax cushi 'aínbi isana 'ëx mitsubë 'aish cushima 'ianan 'ëx quicësa oquin unin 'aisama 'ai quiax. ¹¹Axa usai quicë unin ca 'unánti 'icën, 'uránxun quiricanën cacësa usaribi oquin cananuna mitsubë 'ixun mitsu cati 'ain. 'Anan cananuna quiricanu nun mitsu cacësabi oquin 'ati 'ain.

¹²An nu ñuicë unicamax ca atúxbi rabiacaia. Usairibi cananuna nux 'itima 'ain. Atun sináncësabi oi ca 'ia, atux ca bëtsibë tanánantishi cuëënia. Upí oquin sinanima ca usai 'ia. ¹³Atux ca atun sináncësabi oi 'ia. Usa 'aínbi cananuna nun Nucën Papa Diosan nu mënfoxuncë sabi oquinshi 'ain. An mënfoxuncësabi oquin cananuna mitsuribi aín bana ñiuxuan. ¹⁴Nunbi sináncë cupíma, Nucën Papa Diosan nu mënfoxuncë cupíshi, cananuna mitsun émanu cuanxun aín banami 'unánun mitsu ñiuxuan. Nucën Papa Diosan mënfosabi oquin cananuna nun pain mitsu Cristo ñiuiquin bana ñiuxuancën. ¹⁵Bëtsi unin 'aquincë cupía uni Jesucristomi sinania cananuna —'ën bana ñiuxuncë cupíshi ca usai 'iaxa —quixun caiman. Usa 'aínbi cananuna mitsúnmi Cristomi catamëquin ënquinma ax quicësabi

oquin 'acé cupí, aín bana mitsu 'unánmitéceni cuainsa tanin, Nucèn Papa Dios cuèncèbè. ¹⁶Usoquin mitsu amiribishi 'unánmitécèntancèx cananuna mitsu 'ura 'icè èmacama, anua unin bana ñuixuncèma, acamanu cuanquin Cristo ñuiquin bana ñuixuni cuanti sinanin, nun 'unánmixunmabi uni itsían 'unánmicè, nun 'unánmicè isa quixun catima cupí.

¹⁷Ui unin cara —'èn cana upí oquin 'ai —quixun sinania, an ca —Nucèn 'Ibu Jesusan 'amicèxuinshi cana upí oquin 'ai —quixun sinánti 'icèn. ¹⁸Axa rabiacaè uníxma, axa Nucèn 'Ibu Jesucristonèn iscèx upí 'icè uni, ax cuni ca asérabi upí 'icèn.

Pablo 'imainun Jesucristonèn 'imicèxun isa aín bana ñuixunia quicè unicama

11 ¹Sinánñuma uni 'icèesai 'èx rabiti banaiaibi mitsu 'èn bana cuati cana cuèènin. Usai banaiaibi 'èn bana cuatibi camina 'icanin. ²Cristonainshi 'inun cana mitsu aín bana ñuixuan. Usa 'ixun cana xanúxa bètsi unin bana cuatima aín bènèn banaishi cuati ami sináncēsariibi oi, mitsux bètsi bana quicèsa oíma Cristo quicèsaabi oíshi 'iti cupí, mitsu cain, Nucèn Papa Diosan 'è sinánmicèxun. ³Ax cèmèti 'unan 'ixun ca runun Eva paráncèxa. Usaribi oquin sapi ca anu 'icè unicaman mitsu parania quixun cana 'itsa sinanin. Cristomi asérabi upiti catamècè 'ixunbi sapi camina bètsi oquin sinánquin aín bana ènti 'ai quixun cana sinan. ⁴Mitsun camina uni itsían nun 'acèsabi oquin Jesusan bana ñuixunquinma, a bana bètsi oquin ñuixuncèxun cuatin. Cuanan camina Nucèn Papa Diosan Bèru Ñunshin Upitan sinánmicèma, bètsi ñunshinan sinánmicè unicaman mitsu ñuixuncèxun a bana cuatin. Cuanan camina Jesucristo cupía Nucèn Papa

Diosan nu iémiti a bana pain cuaxunbi ènquin béri bétsi bana, unin ñuixuncè, aribishi cuacanin. ⁵Mitsúnmi, 'esamaira isa a unicama mitsun aín bana cuacè, ax 'icè quixun sináncèbèbi, cana 'èn sináncèx 'èx atu meuma 'ain. ⁶Èx upíira upiti banati 'unáncè 'ixunmabi 'èn ñuicè bana ax ca asérabi 'icèn, nun mitsu ñuixuncè banacama quicèsaabi oi 'ia camina nu iscan.

⁷Èn añubi ñucáquinma mitsu anun Nucèn Papa Diosan 'iti bana ñuixuncè cupí, sapi camina, mitsux ismina 'èx meura 'imainun 'è manámi 'ai quixun sináncanin. ¿Mitsun sináncèx cara añubi ñucáquinma 'èn mitsu bana ñuixunti 'aisama 'iax? ⁸Mitsu bana ñuixunti cupí cana bètsi èmacamanuxuan axa Jesucristomi catamècè unicaman 'ináncèxun curíqui bian. ⁹Mitsubè 'aish ñuñuma 'ixunbi cana mitsu ñu ñucácèma 'ain. Macedonianuaxa ucè axa Jesucristomi catamècè unicaman cuni ca 'èn cuèncè ñucama 'è 'inánxa. 'Èn mitsu 'acèsabi oquin cana mitsu ñu ñucátima 'ain. ¹⁰Cristonan 'aish cèmèquinma cana mitsu cain, Acaya menu 'icè unicamaxa atúinsa 'è ñu 'inánxa quitin rabanan cana a ñubi bitima 'ain. ¹¹¿Uisacatsi carana usai banain? Mitsun sapi camina sinanin, 'èn cana mitsu nuibatima quixun. Nucèn Papa Diosan ca uisaira oquin carana 'èn mitsu nuibati quixun 'unania.

¹²Usoquinmi sináncancèbètanbi cana 'èn 'acèsabi oquinshi 'ati 'ain. Mitsubè 'icè unicama, an nun ñuicè banama bana itsi ñuicè, acamax ca quia, nux cananuna Pablo 'imainun abè 'icè unicama 'icèsariibi 'ain, abè sènéñriibi 'aish. Nun 'acèsariibi oquin ca Pablonèn curíqui bitsia. A unicamaxa usai quitin rabanan cana curíqui bitsiman. ¹³A unicamax ca —Cristo unicama ñuixunun ca Nucèn Papa Diosan nu

'imiaxa —quix quia. Usai quibi ca asérabi usama 'icën. Cëmëquinshia an uni parancë ca atux 'icën. ¹⁴Usaquin uni parania isfbi camina ratúcantima 'ain. Ñunshin 'atimanën 'apu, Satanás, anribi ca aín bana isa Diosan banasaribi 'icë quixun sinánmisa tanquin uni parania. ¹⁵Usaribiti ca ñunshin 'atimanën 'apúan sinánmicë uni, ax bëtsi unían iscëx an ñu upí 'acë unisa 'icën. Usa 'aishbi ca asérabi Nucën Papa Diosmi sinánquin ñu 'acëma 'aish Nucën Papa Diosnanma 'icën.

Jesusan bana ñuixuncë cupí Pablo tëmëra

¹⁶Amiribishi cana mitsu cain, mitsúnmi —sinánñuma ca —quixun 'ë sinánti cana cuëñiman. —Sinánñuma ca —quixun 'ë ñuiquinbi camina 'ën mitsu cacëxun cuati 'ain, an 'ë ñuicë unicamaxa 'icësaribiti 'itsamashi 'ëx rabiacamainun. ¹⁷Nucën 'Ibu Jesucristonën ca rabiacanun 'ë cacëma 'icën. Sinánñuma uni 'icësaishi cana rabiaca-tin. ¹⁸Itsaira uníxa ënë nëtënu 'icë ñuishi sinani rabiaccësaribi oi cana 'ëxribi rabiacati 'ain. ¹⁹Mítsun, nux sinánñuma 'imainun ismina mitsux sinánñuira 'ai quixun sinánquinbi camina a unicamax banaia cuëñquin cuatin, atúxa sinánñuma 'icëbi. ²⁰A unicaman atun cuëncësa oquin 'acëxunbi camina mitsun tanshitin. Atun ca mitsu ñu mëëmianan, paránxun mitsun ñu bianan, mitsux camina meu 'aish atubë sënénma 'ai quixun canan, mitsu bëtashcaia. Usaquin 'acëxunbi camina tanshitin. ²¹Nux cushima 'ixun cananuna mitsu usoquin 'acëma 'ai quixun sapi camina sináncanin.

Uni sinánñuma banacësa 'aishbi cana a unicama rabiaccësaribi oi 'ëx rabiacati 'ain. ²²¿Atúxëshi cara hebreo banan banacë uni 'ic? 'Ëxribi cana usaribi 'ain. ¿Atúxëshi cara Israelnën

rëbúnqui 'ic? 'Ëxribi cana usaribi 'ain. ¿Atúxëshi cara Abrahamnën rëbúnqui 'ic? 'Ëxribi cana usaribi 'ain. ²³¿Atun cara Cristo ñuiquin bana ñuixunin? Sinánñuma uni quicëσαι cana quin, atun 'acësamaira oquin cana 'ën 'acën. Atux 'icësamairai cana bana ñuixuni tëmëracën, atu 'acësama oquin ca 'ë 'itsa oquin sipuacancëxa, atu 'acësama oquin ca 'ë 'itsa oquin rishquicancëxa, 'itsai cana bamaibi íëacën. ²⁴Mëcën achúshi oquin ca judíos unicaman 'ë treinta y nueve oquin rishquiacëxa. ²⁵Rabé 'imainun achúshi oquin ca 'ë manë xon rishquicancëxa. Achúshi oquin ca 'ë maxaxan 'acancëxa. Rabé 'imainun achúshiti ca 'ëx anun cuancë manë nuntí nanëti nëtéacëxa. Achúshi oi cana manë nuntí nëtécëbë achúshi imé 'imainun achúshi nëténribi parún-papa nëbétsinuax mënuacën. ²⁶Ën nicënuax cana 'aisamaira tëmëracën, bacan cuani 'ianan men cuaniribi. Bëtsi nëtën cana bacamiquisa 'iacën, bëtsi nëtën cana an ñu mëcamacë unin 'aisa 'iacën. Bëtsi nëtën ca judíos unibu 'imainun judíosma unibu, acamanribi 'ë bëtsi bëtsi oti sináncëxa. Bëtsi nëtën ca ëma chanu 'icë unicamaribi 'ëmi tsuáquiruacëxa. Bëtsi nëtën cana anu uni 'icëma menuax tëmëracën. Bëtsi nëtën cana parún-papanuax tëmëracën. Bëtsi nëtën ca axa —Cristonan cana 'ai —quibi cëmëcë unicamaxribi 'ëmi nishacëxa. ²⁷Ñu mëëi cana tëmëracën. 'Uxti téanan cana 'acëñuma 'aish panacë 'ianan, shimanan, chupañuma 'aish matsin bamatísa 'iacën. Usai cana tëmëracën. Usa 'aish cana usabii 'in.

²⁸Ënë ñucama 'imainun cana camabi nëtën, camabi ëmanu 'icë axa Jesucristomi catamëcë unicama cara asérabi Jesucristomi catamëtia quixun sinani bënëtin. ²⁹Ui unix cara ami catamëcë 'aishbi Jesucristomi manutia a uni cupí

cana 'èxbi Jesucristomi manucësa 'aish masá nuitutin. Usa 'aish cana unían axa Jesucristomi catamëcë uni 'uchamicëbë 'ëribia usoquin 'acësa 'aish rabíanan an a uni 'uchamicë unimi nishin. ³⁰'Èx rabiácátisa tani cana —'ënbi sinánxun ñu 'atima 'icëbi ca Nucën Papa Diosan 'ë 'aquianxa —quixun sinánquin a rabi rabiácátí 'ain. ³¹'Èn mi cacë ax ca cëmëma 'icë quixun ca Nucën Papa Diosan 'unania. Ax ca Nucën 'Ibu Jesucristo aín Dios 'aish aín Paparibi 'icën, a ca camabi unin nëtétimoquin rabiti 'icën. ³²'Èx Damasconu 'ain ca an Aretas cacë 'apu ñu mëëxuncë unin a 'apun suntárucama 'ëa chiquitia binun quixun, a ëma aín cënën xëcuëcama bëaramiacëxa. ³³Usoquian bëaracancë 'aínbi ca caquí chanu 'aruxun, cënë manámia 'icë xëcuë chararatsunën 'ë ëman 'apácancëxa. Usocëx cana 'iacëacën.

Namácësa oquian Pablonën isa

12 ¹'Èx rabiácacë 'aishbi ca ñancaíshi 'iti 'icën. Usa 'aínbi cana 'ën namáquin iscësa oquin Nucën 'Ibu Jesucristonën ismicë ñu 'imainun an 'ë sinánmicë ñu a ñuiti 'ain. ²'Èn cana ësaía 'ia ñu 'unanin. Axa Cristomi catamëcë uni achúshinëx ca naí cata rabé 'ucë cuancëxa, Nucën Papa Diosan 'imicëx. Aín namibëbi cara cuancëxa, aín bëru ñunshínshi cara cuancëxa cana 'unaniman. Nucën Papa Diosainshi ca 'unánxa. Usai a uni 'iá ca catorce baritia 'icën. ³A uni cara aín namibë cuancëxa, cara aín namibëma cuancëxa quixun cana 'unaniman. Nucën Papa Diosainshi ca 'unánxa. ⁴'Èn cana 'unanin, an 'imicëx ca a uni Nucën Papa Diosan nëtënu cuancëxa. Cuanxun ca uinu 'icë unínbia ñuitima bana cuacëxa, cuanan ca uinu 'icë unínbia chiquinaquin uni ñuixuntima bana cuacëxa. ⁵'Èxbi ënë ñu

ñui rabiácátisa 'aishbi cana 'èxbi rabiácátiman. 'Ènbi sinánxun ñu 'atima 'icëbi ca Nucën Papa Diosan 'ë 'aquianxa quixuinshi sinani cana rabiácátin. ⁶Rabiácátisa tani 'èx quicëxbi ca 'ën bana, cëmëma 'aish sinánñuma uni banacësa 'itima 'icën. Usa 'aínbi cana rabiácátima 'ain. 'Èx rabiácatiámabi camina 'ën 'acë ñucama isanan 'ën bana cuaquin mitsun uisa uni carana 'èx 'ai quixun 'unánti 'ain. Usaribi oquin camabi unin 'ë 'unánti cana cuëënin.

⁷Insíncë 'aish 'ën nami paëi 'èx ubiti tëmëracë 'aínbi ca Nucën Papa Diosan 'èx aín nëtënu cuanxun ñu iscë cupí rabiácátí rabanan usoquin 'ë 'iminun ñunshin 'atimanën 'apu ëanxa. ⁸Rabé 'imainun achúshi oquin cana Nucën 'Ibu Jesucristo 'ën ñucë ënëa 'ë tërécaxunun quixun ñucan. ⁹Ñucácëxunbi ca 'ë caxa: "Èn mi nuibaquin 'aquincëxun 'unani camina usashi 'iti 'ain. An —cushima cana 'ai —quixun sináncë uni, a cana 'ën cushínbi upí oquin ñu 'anun 'aquinin". Usoquin ca Nucën 'Ibu Jesucristonën upiti ami catamëquin ñucë 'ixunbi ñu 'anun 'ë 'aquinia quixun 'unani cana 'èx ñucë 'aishbi cuëënin. ¹⁰Usa 'aish cana Cristo ñuiquin aín bana unicama ñuixuncë cupí uni 'ëmi 'atimati banacë 'ianan ñuñuma 'ianan unin bëtsi bëtsi ocë 'ianan numi uni nishmainun bëtsi ñu cupíríbi tëmëraquinbi bënëquinma tanshitin. Usa 'aish cushima 'ixunbi cana Cristonën cushiocë xun ax cuëëncësabi oquin cushiñu 'ixun ñu 'ati 'ain.

Corintonu 'icë axa Jesucristomi catamëcë unicamami sinania Pablo bënëa

¹¹Mitsúnmi 'ë rabicëma cupí cana sinánñuma uni banacësari rabiácacën. Mitsúxira 'ë rabi upiti banatisa 'ixunbi camina —Pablosamaira 'aish ca an

Pablo ñucicé unicama ënëx Nucën Papa Diosan uni 'icé —quixun sinánan 'ën bana isa ñancáishi 'icé quixun sinánquin a unicaman mitsu ñuixuncé bana cuacanin. Usaquinmi mitsun sináncé bëbi cana 'ëx a unicama meuma 'ain, 'ënbi 'aquinma, Nucën Papa Diosan aín cushin 'amicëxuinshi 'ën 'acé cupí. ¹²Mitsubé 'ixun cana têmëraquinbi tanshiquin, Cristo ñuiquin bana ñuixuan, uni itsin 'acëma ñu 'acën. 'Ën 'aia isquin camina, 'ëx cana asérobi Nucën Papa Diosan aín bana ñuixunun caíscé 'ai quixun 'unancën. ¹³'Ën bëtsi bëtsi ëmanu 'icé axa Jesucristomi catamécé unicama 'acésaribi oquin cana mitsu nuiban, mitsúxmi atusaribi 'icé. Usa 'aínbí sapi camina mitsúnmi curíqui 'inánti sinántisa tancëxunbi 'ën bicëma cupí masáquin sináncanin. 'Ën mitsun curiqui bicëma axa 'aisama 'ain camina 'ëmi masáquin sinánquinma a ñu manucanti 'ain.

¹⁴Rabëti cana mitsu isi cuan. Amiribishi mitsu istëcëni cuanti cana sinanin. 'Ën 'acésabi oquin cana curíqui 'inánanmi 'ë ñu 'ináncanun mitsu ñucátima 'ain. Mitsun 'ë ñu 'inánquinmabimi mitsun 'ë nuibati ashi cana cuëënin. Aín bëchicënën ca uni curíqui timëxuntima 'icën. Aín papan cuni ca aín bëchicé curíqui timëxunti 'icën. Usa 'ain cana 'ëx mitsun papasa 'ixun mitsun curíqui bitima 'ain. ¹⁵'Ëx asérobi mitsu nuibati têmëraquinbi cana Cristo cupí mitsux upí 'inun mitsu aín bana ñuixunquin, 'ën curíqui cëñúanan 'ën cushi cëñúquinbi 'aquinti 'ain. 'Ën mitsu asérobiira nuibacëxunbi sapi camina 'ën 'acésaribi oquin mitsun 'ë nuibatiman.

¹⁶Micama raírinëx caísmína 'ën isna mitsúnmi 'ë 'itsaira nuibaquin 'aquinun quixun mitsu paránquin bana ñuixunquin ñu ñucácëma 'ai quiax quin. ¹⁷¿An mitsu paránun carana uni xuan?

Cananuna xucëma 'ain. ¹⁸Mitsu istánun cana Titocëñun axa Cristomi catamécé uni itsiribi xuan. ¿Titon cara mitsu paranx? Titobëtan ca axa abé 'icé unin mitsu paráncëma 'icën. 'Ën 'acésaribi oquin sinánquin ca atun ñu 'axa.

¹⁹Nun usaquin mitsu cacëxun oquin mitsun nu nuibanun quixun isanuna ësaquin mitsu cai quixun sapi camina sináncanin. 'Aíshbi ca usama 'icën. 'Ën nuibacé xucéantu, cana mitsu cain, ami catamëti ax quicésabi oíshi 'inun cananuna Cristo cuëëncësabi oquin mitsu 'aquinsa tanquinshi ënë ñucama mitsu ñuixuan. Asérobi ca usa 'icé quixun ca Nucën Papa Diosan 'unania. ²⁰'Ën mitsu isi cuanxun iscëxbi sapi camina 'ën sináncësama 'icanti 'ai quixun cana sinanin, 'ëxribi mitsun sináncësama 'imainun. Usa 'ixun cana sinanin, mitsux sapi camina nutsi cuamianani cuëbicananan, bëtsibé bëtsibé nishánancé 'ianan, bëtsimi manáncé 'ianan, minainshi ñu 'ati sinánan bëtsi unibé ñuianancé 'ianan, rabiacaquin upí oquin sináncëma uni 'ain. ²¹Mitsu isi cuantëcënia sapi ca aín bana cuacé 'aíshbimi usai 'icancëbëtan Nucën Papa Diosan mitsu cupí 'ë rabínmiti 'icé quixun cana sinanin. 'Imainun cana sinanin, mitsu raírinën ñu 'aisama 'ai mitsunanmabi xanu itsibé 'ianan xanusa unibé 'ianan ñunshinacé quin ñu 'atima 'aquin, a ñucama manuquin sinanacëma cupí sapi cana bëunan mëscúti 'ai quixun.

**Pablonëan ashiquin 'ësëanan
bëruánxa 'inun ca**

13 ¹Mitsu isi rabëti cuan 'aíshbi cana amiribishi mitsu isi cuantëcënti 'ain. Camabi ñu ca unin, rabé unían ñuia cuapánti 'icën. Rabé 'imainun achúshi unían ñuiaira ca asérobi ca quixun 'unánti 'icën. ²Mitsu

isi cuanx anu 'ixun cana mitsu can, 'ën mitsu istëcëni uxun iscëxa an ñu 'atima 'acë unicama 'imainun raíri uníxribi sinanatíma usabi 'ain, cana atu 'ësëquin cushin cati 'ain. Usoquin 'ën mitsu cacësabi oquin cana 'ura 'ixunbi ënë quiricanën mitsu catëcënin. ³Mitsun camina upí oquin 'unántisa tan, carana Cristonën sinánmicësabi oquin unicama bana ñuixuni quixun. 'Ëx mitsu isi amiribishi cuanxun, an ñu 'aisama 'acë unicama cushin cacëbëtan, camina 'unánti 'ain, Cristo ax ca asérami 'ëbë 'icë quixun. Cristo ax ca cushiñúmama 'icën. Usa 'ixun ca mitsu sinanamianan ami catamëtími upí 'inun 'imiquin, aín cushi mitsu ismiti 'icën. ⁴Cristo ax ca uni itsi 'icësaí i curúsocënu matáscë 'iacëxa. Usai 'ia 'aíshbi ca bërí Nucën Papa Diosan cushin uisatimoi tsotia. Usa 'ain cananuna nux Cristo 'iásaribiti 'iquin uisa cara unin ocëxunbi cupiquinma tanshiti cushimasa 'ixunbi an 'imicëxun Nucën Papa Diosan cushin mitsu 'aquinin.

⁵Mitsúnbi camina sinánti 'ain, caramina asérami Cristomi catamëti ax cuëncësabi oi 'i quixun. Upí oquin ca sinan. ¿Caramina 'unaniman. Jesucristo ax ca asérami mitsubë 'icë quixun? Asérami Cristonanma 'ain ca ax mitsubëma 'icën. ⁶Cristo ca asérami nubë 'icë quixunmi mitsun 'unánti cana cuëënin. ⁷Mitsun —usama ca —quixun nu sináncëbëtanbi cananuna ñu 'atima 'axmami 'icanun quixun Nucën Papa Dios mitsu ñucáxunin. Nun cananuna mitsu upí oquin 'unánmia quixuan unin

sinánti cupíma, mitsúnmi upí ñu 'ati cupíshi, cananuna Nucën Papa Dios mitsu ñucáxunin. ⁸Cristonën bana quicësama oquin cananuna 'aiman. Aín bana quicësabi oquinshi cananuna 'ain. ⁹Nux cushimasa 'ixunbi 'aquincëxmi mitsux upí 'ain cananuna cuëënin. Mitsun ñu 'atima 'acëcama mëníocë 'aish upíshi 'inun cananuna ënquinma Nucën Papa Dios mitsu ñucáxunin. ¹⁰Nucën 'Ibu Jesucristonën, mitsu 'atimoquinma an iscëx upí 'inun 'aquinun 'ë cacë 'ixun, cana mitsu isi cuantëcënxunmashi ënë quirica mitsu buánmin, cuanxun 'ën iscëxmi 'aisama 'icania cushin banaquin masá nuitumi-quin mitsu catin rabanan.

¹¹Ën xucéantu, chuámashi camina 'icanti 'ain. Añu ñucama cara 'aisama 'icë camina mënfoquin sinántëcëntima 'ain, 'ën mitsu cacë banacama cuati camina bëtsin sináncësabi oquin sinani nishananíma nuibananishi 'icanti 'ain. Usai 'ia ca Nucën Papa Dios, an aín unicama nuibaquin bënëtima chuámarua 'inun 'imicë, ax mitsubë 'iti 'icën. ¹²Jesucristo cupí mitsun nuitu upí 'aish camina chuámarua 'inux bëtsibë bëtsibë cananti 'ain. ¹³Axa 'ëbë 'icëcama Cristonën 'imicë 'aish aín sinan upíra upí acamanribi ca mitsu chuámarua 'aishmi bërúanx 'icanun 'ë camiata.

¹⁴Mitsux 'uchacëbi Nucën 'Ibu Jesucristonën nuibaquin iémicë 'icëa Nucën Papa Diosanribi nuibamainuan aín Bëru Ñunshin Upí axribi mitsubë 'icëbëmi chuámarua bucantí cana cuëënin. Ashi, Pablo.